

ՈՐԲԸ

(Հայ ժողովրդական ավանդույթուն)

Սըհա՛կ... Սըհա՛կ... գիշերն ի բուն
 Կանչում է Որբն աղեկըտուր,
 Աշխարհքն այնինչ մըտած խոր քուն,
 Ինքը մենակ ու շուրջը լուռ:

5 Աղջիկ էր նա մի ժամանակ,
 էնպես աշխո՛ւյժ ու գեղանի.
 Թուրքը տեսավ, խելքը գընաց,
 Ուզեց զոռով հարեմ տանի:

— Մի՛ վախենար, սիրուն քուրի՛կ,

10 Ես չեմ թողնի քեզ տանելու.
 Քեզ կըթռցնեմ, ինչպես մըրրիկ,
 էս աշխարհքից հեռո՛ւ, հեռո՛ւ...

էսպես ասավ քաջ Սըհակը,
 Քըրոջն առավ փախա՛վ, գընաց,

15 Թողած իրենց հոր աշխարհքը,
 Թուրքի դաժան լուծը թողած:

— Տե՛ս, էն ձյունոտ, բարձրը սարեր,
Որ ձրգվում են հեռվում ահա,
էն սարերն էլ անցնենք թե չէ՝
20 Դենը, քուրի՛կ, էլ թուրք չըկա...

Հենց էս խոսքում՝ թուրքը հասավ,
Սև ձին քըշած՝ սարի տակից.
— Իմն է աղջիկն, իմն է, ասավ,
Ո՛ւր եք փախչում դուք իմ ճանկից...

25 — Մի՛ վախենար, սիրուն քուրի՛կ,
Կանգնած եմ ես շար թուրքի դեմ.
Փախի՛ր, գընա՛... Ինչպես մըրրիկ՝
Ես էլ կըգամ քեզ կըհասնեմ...

Ու ետ դարձավ քաջ պատանին,
30 Զենքի շաչուն, զարկ ու աղմուկ.
Զարկ են տալիս, զարկ են առնում
Հայի անահ կըտրիճն ու թուրք...

Աղջիկն արագ վազ է տալի,
Շունչը հատած փախչո՛ւմ, փախչո՛ւմ.
35 Մին էլ նայեց՝ թուրքն է գալի,
Փընչում է ձին, գենքը շաչում...

— Ա՛խ, ի՛նչ կըլնի թոչուն դառնամ...
Կանչեց ահից խեղճը հանկարծ,
Ու, բաց էին դըռներն երկնից,
40 Լըսեց նըրա ձենը Աստված:

Դարձավ թըռչուն մի թևավոր,
Յրկինքն ելավ, թըռա՛վ, պըրծա՛վ.
Մընա՛ց, մընա՛ց, մինչև էսօր
Քաջ ախպերը ետ շըդարձավ:

45 էն օրվանից թըռչուն քույրը
Ցերեկն ահով կուչ է գալի,
Հենց հասնում է մութ գիշերը`
— Սըհա՛կ... Սըհա՛կ... ձեն է տալի:

Ձեն է տալի գիշերն ի բուն
50 Կանչում տըխո՛ւր, աղեկըտո՛ւր,
Աշխարհքն այնինչ մըտած խոր քուն,
Ինքը մենակ ու շուրջը լուռ: